



Broj: 05-4862-7/15  
Sarajevo, 12. 02. 2016. godine

Na osnovu člana 70. Zakona o javnim nabavkama („Službeni glasnik BiH“ broj 39/14, u nastavku: Zakon), preporuke Komisije za provođenje postupka nabavke usluga čišćenja poslovnih prostorija Agencije za bankarstvo Federacije BiH iz Zapisnika o pregledu i ocjeni ponuda broj: 05-4862-6/15 od 10. 02. 2016. godine i člana 22. Statuta Agencije za bankarstvo Federacije BiH („Službene novine Federacije BiH“ broj 42/04), direktor Agencije za bankarstvo Federacije BiH donosi

## O D L U K U

o poništenju postupka javne nabavke u otvorenom postupku

### I.

Poništava se postupak javne nabavke usluga čišćenja poslovnih prostorija Agencije za bankarstvo Federacije BiH u Sarajevu, Zmaja od Bosne 47b, s obzirom da nijedna od primljenih ponuda nije prihvatljiva.

### II.

Ponude ponuđača: „Konis“ d.o.o. Sarajevo, „Atalian Global Services“ d.o.o. Sarajevo i „Kristal“ d.o.o. Sarajevo, odbijaju se kao neprihvatljive.

### III.

U skladu s članom 70 stavom (6) Zakona Agencija za bankarstvo Federacije BiH objavit će ovu odluku na svojoj internetskoj stranici: [www.fba.ba](http://www.fba.ba), istovremeno s upućivanjem iste ponuđačima koji su učestvovali u ovom postupku.

## Obrazloženje

Agencija za bankarstvo Federacije BiH pokrenula je postupak javne nabavke usluga čišćenja njenih poslovnih prostorija u Sarajevu, Zmaja od Bosne 47b. Obavještenje o nabavci predmetnih usluga objavljeno je na Portalu javnih nabavki dana 24. 12. 2015. godine pod brojem 3010-1-2-44-3-23/15.

Kao kriterij za dodjelu ugovora odabrana je najniža cijena tehnički zadovoljavajuće ponude.

U skladu s Obavještenjem o nabavci i tenderskom dokumentacijom, javno otvaranje ponuda obavljeno je 11. 01. 2016. godine u poslovnim prostorijama Agencije u Sarajevu, Zmaja od Bosne 47b, što je evidentirano u Zapisniku o otvaranju ponuda, u kojem je konstatovano da su ponude po ovom predmetu nabavke podnijeli ponuđači: „Konis“ d.o.o. Sarajevo, „Atalian Global Services“ d.o.o. Sarajevo i „Kristal“ d.o.o. Sarajevo.

U skladu s utvrđenom procedurom, shodno članu 65. Zakona, Komisija je izvršila pregled i ocjenu ponuda te na osnovu izvršene analize istih u pogledu ispunjavanja zadanih kvalifikacijskih uslova, ustanovila slijedeće nepravilnosti:

- a) Ponuđač „Konis“ d.o.o. Sarajevo nije ispunio uslove iz tenderske dokumentacije (u nastavku: TD) koji se odnose na dostavljanje garancije za ozbiljnost ponude, u dijelu u kojem se od ponuđača zahtijeva dostavljanje garancije za ozbiljnost ponude u originalu, u zatvorenoj plastičnoj foliji (koja se npr. na vrhu zatvori naljepnicom na kojoj je stavljen pečat ponuđača ili se otvor na foliji zatvori jamstvenikom, a na mjesto vezivanja zalijepi naljepnica i otisne pečat ponuđača), koja mora biti uvezana u cjelinu i činiti sastavni dio ponude.  
Ponuđač je originalnu garanciju dostavio u posebnoj kovrti, koja nije uvezana u ponudu i ne čini njen sastavni dio, što je u suprotnosti sa zahtjevima propisanim u poglavlju V. u tački A. TD.

Pored navedenog, izdana garancija dostavljena je s rokom važnosti: krajnji rok za dostavljanje ponuda plus 30 dana i ističe s danom 11. 02. 2016. godine, što nije u skladu sa zahtjevima iz pomenutog poglavlja TD kojim je propisano da je ponuđač dužan dostaviti garanciju za ozbiljnost ponude s rokom važnosti: period važnosti ponude (60 dana) plus 30 dana.

b) Ponuđač "Atalian Global Services BH" d.o.o Sarajevo je:

- dostavio potvrdu o uspješnoj realizaciji ugovora o održavanju i čišćenju, izdanu od strane TC Importane d.o.o. Sarajevo, naslovljenu na firmu "Atalian Global Services BH" d.o.o. Sarajevo, koja u traženom periodu, odnosno u vrijeme zaključenja ugovora, nije postojala;
- vršio ispravku/prepravku datuma u obrascu Izjave o ispunjenosti uslova iz člana 50. tačke c), d), e) i g) Zakona na nepropisan način, bez da je ista potvrđena potpisom ponuđača, uz navođenje datuma ispravke (ispravke u ponudi moraju biti izrađene na način da su vidljive i potvrđene potpisom ponuđača, uz navođenje datuma ispravke);
- vršio ispravku datuma u obrascu Izjave o ispunjenosti uslova iz člana 52. Zakona na nepropisan način – korektorom, bez da je ista potvrđena potpisom ponuđača, uz navođenje datuma ispravke (ispravke u ponudi moraju biti izrađene na način da su vidljive i potvrđene potpisom ponuđača, uz navođenje datuma ispravke).

c) Ponuđač "Kristal" d.o.o. Sarajevo nije ispunio uslove iz TD koji se odnose na dostavljanje garancije za ozbiljnost ponude, u dijelu u kojem se od ponuđača zahtijeva dostavljanje garancije za ozbiljnost ponude u originalu, u zatvorenoj plastičnoj foliji (koja se npr. na vrhu zatvori naljepnicom na kojoj je stavljen pečat ponuđača ili se otvor na foliji zatvori jamstvenikom, a na mjesto vezivanja zalijepi naljepnica i otisne pečat ponuđača), koja mora biti uvezana u cjelinu i činiti sastavni dio ponude. Ponuđač je originalnu garanciju dostavio u posebnoj koverti, koja nije uvezana u ponudu i ne čini njen sastavni dio, što je u suprotnosti sa zahtjevima propisanim u poglavlju V. u tački A. TD.

Slijedom navedenog, komisija je predložila da se sve prispele ponude odbiju, u skladu s članom 68. stavovima (1) i (4) tačkom i) Zakona, te dala preporuku da se predmetni postupak poništi, u skladu s članom 69. stavom (2) tačkom d) Zakona, s obzirom da nijedna od primljenih ponuda nije prihvatljiva, što je evidentirano u Zapisniku o pregledu i ocjeni ponuda, broj i datum iz uvodnog dijela ove odluke. Uvažavajući navedeno, ugovorni organ prihvatio je prijedlog Komisije te donio odluku kao u dispozitivu.

Pouka o pravnom lijeku:

Protiv ove odluke može se izjaviti žalba u roku od 10 (deset) dana od dana prijema ove odluke. Žalba se izjavljuje ugovornom organu u pisanoj formi, direktno, elektronskim putem ili preporučenom poštanskom pošiljkom. Žalbu je potrebno podnijeti u dovoljnom broju primjeraka koji ne može biti manji od 3 (tri).



Dostaviti:

- svim učesnicima u postupku
- a.a.